

Impressiuns dil mund

(fmr/sr) Grazia al success cun «twintheworld» han ils dus instagrammers Roman Flepp e Valentin Manhart pudiu fundar l'atgna fatschenta. Els han entschiet in bien mument a parter «lur» impressiuns dil mund sin Instagram e han oz rodund 234 000 abonnent(a)s. Lur stil da fotografar ha valur da reconuschientscha. Cheu vesis il Schäfler egl Appenzell Dadens.

Negins fotografas dalla bial'aura

Grazia al success cun «twintheworld» han dus instagrammers fundau l'atgna fatschenta

SUSI ROTHMUND/FMR

Roman Flepp e Valentin Manhart ein fotografas cun grond success. Igl account communabel dils cusrins ei «twintheworld» e quel dumbra rodund 234 000 abonnent(a)s. Aschia s'audan els tiels instagrammers svizzers cul pli bia success e han era fundau in'atgna agenzia. Fotografar ei la pissiun dils dus cusrins Roman Flepp e Valentin Manhart che han omisdus 24 onns. Dapi prest siat onns presentan els gia lur fotografias silla plattafuorma Instagram. Il 2013 ha Valentin Manhart priu part ad ina sentupada d'instagrammers e ha empriu d'enconuscher leu «Wisslaren», in dils piuniers che haveva gia da lezzas uras grond success cun sias fotografias. Quei ei lu era stau in impuls pils dus giuvenotters da presentar silla pagina communabla «twintheworld» lur fotografias sin Instagram. Da quei temps fageva Roman Flepp bia fotografias dallas muntognas a Mustér e contuorn e Valentin Manhart ella regiun da Walenstadt. Adina puspei ein els viagiati ensem per la Svizra e pil mund entuorn ed oravontut il nord fascinescha ils cusrins. Lur fotografias han ina nota persunala e derasan pil solit in'atmosfera ruasseivla e mistica. Per mussar la vera grondezia dallas cuntradas alpinas posiziuneschan ei pil solit ina persuna enzanua el maletg. Mintgina ei autra e tuttina paran las fotografias ed era ils videos d'haver enzatgei communabel. San ins dir ch'els hagian in agen stil e seigien tuttavia buca fotografas dalla bial'aura? «Gie, quei constat. Nus preferin l'atmosfera che regorda al nord – il pli fascinont eis ei avon in stemprau e nus fotografein era savens la damaun e la sera», conceda Roman Flepp ed aschunta ch'in tschiel blau seigi buc in motiv tschercau per els.

Entschiet in bien mument

Entschiet a fotografar han ils dus giuvens cul telefonin e cul temps han ei anflau cun Nikon in sponsur per apparats da fotografar. A moda autodidacta han ei empriu d'elavurar las fotografias, luvrar cun dronas ed aschia ein lur maletgs daventai pli e pli professionals. Spert ei il diember d'abonnents da «twintheworld» carschius e destinaziuns turisticas sco Grischun Vacanzas, Sedrun Mustér Turissem, hotels ed autras interpresas ni marcas han vuliu collavurar cun els. «Nus havein entschiet in bien mument, da quei temps dev'ei aunc buca bia influenzers ed ei era empau pli sempel da seposiziunar che oz», seregorda Roman Flepp ch'ei carschius si a Mustér e ha studegiu d'electroinschignier alla Scola politecnica federala (SPF) a Turitg. Suentar siu bachelor ha el fatg in onn praticum ed entscheiva cul master igl atun. Siu

cusrin Valentin Manhart ei carschius si a Walenstadt e studegia all'Universitad da Freiburg historia e geografia. «Nus havein vului emprender enzatgei <endretg>, ins sa gie mai co quei cun instagram e medias socialas sesvilupescha», declara Roman Flepp e ri. Per quei lessien ei pil mument era buc seconcentrar mo sin quella sparta. Malgrad ch'ei possien gia ussa gudignar avunda daners per viver cun l'atgna agenzia e las collaboraziuns cun firmas vulan ei pil mument metter sin duas cartas. Co ei vesi ora igl avegnir possien ei aunc buca dir, quei dependi dil success. Lur accumpignament professional per firmas e destinaziuns che giavischien ina buna preschientscha ellas medias socialas seigi en mintga cass pli e pli dumandaus.

Dapli ch'in hobi

Il cusrins secapeschan bein e passentan per quei bugen ensemen il temps liber gudend lur pissiun. Il fotografar ei denton daditg dapli che pissiun e hobi. «Pli professional che tut vegn e pli bia lavur ch'ei dat», di Roman Flepp. Tenor el ein lur viadis en Svizra ed egl exterior pil solit sponsurai. Il sponsurs san profitar dublamein, per l'ina da lur ferma preschientscha e derasaziun sin instagram e per l'otra da lur experientscha e la finfinala survegnan ei bunas fotografias che contonschan tut tenor da 40 000 – 300 000 personas per maletg. Po Roman Flepp dar tips ad entscheviders ? «Gie, il meglier visetan ins in dils workshops da nus. Sco gia detg eis ei actualmein denton buca aschi sempel da daventar influenzer», rispunda el tut um da fatschenta. Enqual tip ha Roman Flepp lu tuttina aunc per lecturas e lecturs: «Impurtont ei da far bunas fotografias e realisar buns filmins. Ina finamira ei era da crear in bien cuntegn e raquintar historias per porscher enzatgei original e fascinond. In impurtont tip ei era da star vidlunder ed esser presents mintga di.»

* Ulteriuras informaziuns e fotografias: www.twintheworld.ch/
www.instagram.com/twintheworld

